

28 JAN 1997

Mahathir-Puasa

MAJLIS BERBUKA PUASA BERSAMA DR MAHATHIR DI KUBANG PASU, LANGKAWI

ALOR SETAR, 28 Jan (Bernama) -- Seperti Ramadan yang lepas, Datuk Seri Dr Mahathir Mohamad dijadual pulang ke Kedah untuk berbuka puasa bersama-sama umat Islam tahun ini -- dua kali di Kubang Pasu dan sekali di Langkawi.

Menurut wakil peribadi beliau di Kubang Pasu, Haji Saad Hashim, Perdana Menteri dijadual menghadiri majlis berbuka puasa di Universiti Utara Malaysia (UUM), Sintok pada 30 Jan dan di Masjid Kepala Batas pada 6 Feb.

Beliau juga dijadual menghadiri majlis berbuka puasa di Ayer Hangat, Langkawi pada 3 Feb.

Setibanya di Alor Setar pada kira-kira pukul 3 petang Khamis ini, Dr Mahathir akan ke kediamannya di Titi Gajah untuk menyaksikan Datin Seri Dr Siti Hasmah Mohamed Ali menyampaikan bantuan hari raya sumbangan Badan Amal dan Kebajikan Tenaga Isteri Menteri dan Timbalan Menteri (Bakti) sebelum mereka berdua ke Pekan Rabu untuk menempah kuih-muih bagi menyambut Hari Raya Aidil Fitri.

Dr Mahathir kemudian ke UUM untuk menyaksikan upacara menandatangani perjanjian antara Bank Bumiputra Malaysia Bhd dan UUM bagi mengadakan "Kerusi BBMB" bagi penyelidikan dan akademik di universiti itu.

Perdana Menteri kemudian menyertai warga kampus dan orang ramai untuk berbuka puasa di Masjid UUM.

Di Langkawi pula, Dr Mahathir dijangka melawat beberapa projek yang sedang dalam pembinaan di sekitar pulau peranginan itu, khususnya berhampiran Lapangan Terbang Antarabangsa Langkawi, Padang Matsirat, setibanya dari Kuala Lumpur pada kira-kira pukul 3 petang.

Anggota Parlimen Langkawi Datuk Abu Bakar Taib hari ini berkata Perdana Menteri kemudian akan menyertai kira-kira 1,000 umat Islam untuk berbuka puasa di Masjid Padang Lalang. -- BERNAMA

ZI MFJ AKD